

AKASHVANI(AIR)
RNU: KOLKATA
Bengali Text Bulletin

Date 10-02-2026

Time: 7.35 AM

বিশেষ বিশেষ খবরঃ-

১) রাজ্যে এস আই আর প্রক্রিয়া কোনোভাবে ব্যাহত করা যাবে না বলে সুপ্রিম কোর্ট স্পষ্ট জানিয়েছে।

শুনানি পর্বে নথি যাচাই বা স্ক্রুটিনির সময়সীমা আরও এক সপ্তাহ বাড়ানোর নির্দেশ দিয়েছে সুপ্রিম কোর্ট।

এসআইআর প্রক্রিয়ায় হিংসার ঘটনা নিয়ে রাজ্য পুলিশের মহানির্দেশককে শোকজ নোটিশ জারি করেছে সর্বোচ্চ আদালত।

২) আসন্ন বিধানসভা ভোট প্রস্তুতি নিয়ে আলোচনা করতে রাজ্যের মুখ্য নির্বাচনী আধিকারিক আজ নির্বাচন কমিশনের সঙ্গে বৈঠকে বসছেন।

৩) এসআইআর-কে মুখ্যমন্ত্রী মমতা ব্যানার্জী যে ভিক্টিম কার্ড হিসাবে ব্যবহার করার চেষ্টা করেছিলেন, সুপ্রিম কোর্টের রায়ে তা নষ্ট হয়ে গেছে বলে বিজেপি মন্তব্য করেছে।

৪) উচ্চ মাধ্যমিকের চতুর্থ তথা চূড়ান্ত সেমিস্টার শুরু হচ্ছে আগামী ১২ই ফেব্রুয়ারি। নেওয়া হয়েছে একগুচ্ছ ব্যবস্থা।

৫) মাঘের শেষে রাজ্য জুড়ে ধীরে ধীরে বাড়তে চলেছে তাপমাত্রা।

রাজ্যে এস আই আর প্রক্রিয়া কোনভাবে ব্যাহত করা যাবে না বলে সুপ্রিম কোর্ট স্পষ্ট জানিয়েছে। SIR প্রক্রিয়ার বিরোধিতা করে নির্বাচন কমিশন এবং রাজ্যের মুখ্য নির্বাচনী আধিকারিকের বিরুদ্ধে মুখ্যমন্ত্রী মমতা ব্যানার্জীর দায়ের করা মামলায় প্রধান বিচারপতি সূর্যকান্ত, বিচারপতি জয়মাল্য বাগচী এবং বিচারপতি বিপুল এম পাঞ্চলির বেঞ্চ গতকাল জানিয়েছে, পদ্ধতিগত বিষয়ে যে কোন নির্দেশের প্রয়োজন হলে আদালত তার ব্যবস্থা করবে। কিন্তু SIR প্রক্রিয়ায় কোনরকম প্রতিবন্ধকতা বরদাস্ত করা হবে না। রাজ্যের শাসক দলের কাছে সুপ্রিম কোর্টের এই নির্দেশ বড় ধাক্কা বলে রাজনৈতিক মহল মনে করছে।

এদিকে, SIR প্রক্রিয়ায় চলতি শুনানি পর্বে নথি যাচাই বা জুটিনির সয়মসীমা আরও এক সপ্তাহ বাড়ানোর নির্দেশ দিয়েছে সুপ্রিম কোর্ট। আজ বিকেল পাঁচটার মধ্যে রাজ্যকে ৮ হাজার পাঁচশো পাঁচজন গ্রুপ-বি আধিকারিকের নাম ERO-দের কাছে পাঠিয়ে দিতে হবে। সেই তালিকা থেকে নির্বাচন কমিশন যাদের কাজে লাগানো প্রয়োজন তাদের মাইক্রো অবজার্ভার হিসেবে নিয়োগ করতে পারবে। এই আধিকারিকরা লজিক্যাল ডিসক্রেপেনসি সংশোধনের কাজে ERO এবং AERO-কে সাহায্য করবে বলে শীর্ষ আদালত জানিয়েছে।

১৪ ই ফেব্রুয়ারির পর আরও এক সপ্তাহ সময় দেওয়া হবে ইআরও-দের, যাতে তারা নথি যাচাই সম্পূর্ণ করে চূড়ান্ত সিদ্ধান্ত নিতে পারেন। তবে গোটা প্রক্রিয়া নিরপেক্ষভাবে করার নির্দেশ দিয়েছে আদালত। কোনোভাবেই তা যেন রাজনৈতিক চাপের মুখে না হয়, সেই বিষয়টি নিশ্চিত করতে হবে।

নির্বাচন কমিশনের অভিযোগ, এস আই আর প্রক্রিয়া চলকালীন কোন অপরাধমূলক ঘটনা ঘটলে তার এফ আই আর করার আর্জি জানানো হলেও তা কার্যকর হচ্ছে না। এসআইআর চালু হওয়ার পর থেকে রাজ্যের বিভিন্ন জায়গায় অশান্তি ও

হিংসার খবর মিলেছে। এর প্রেক্ষিতে রাজ্য পুলিশের মহা নির্দেশককে শোকজ করে ব্যক্তিগত হলফনামা তলব করেছে সর্বোচ্চ আদালত।

রাজ্যে এসআইআর প্রক্রিয়ার ভবিষ্যৎ রূপরেখা এবং আসন্ন বিধানসভা নির্বাচনের প্রস্তুতি নিয়ে আলোচনা করতে রাজ্যের মুখ্য নির্বাচনী আধিকারিক মনোজ কুমার আগরওয়াল আজ নির্বাচন কমিশনের পূর্ণাঙ্গ বেঞ্চে সঙ্গে বৈঠকে বসছেন। এস আই আর নিয়ে সুপ্রিম কোর্টের একাধিক নির্দেশের পর গত রাতেই দিল্লি রওনা হয়েছেন রাজ্যের মুখ্য নির্বাচনী আধিকারিক।

এদিকে, কলকাতা বিমানবন্দরে সাংবাদিকদের প্রশ্নের উত্তরে তিনি জানিয়েছেন চলতি মাসের মধ্যেই চূড়ান্ত ভোটার তালিকা প্রকাশ করার ব্যাপারে কমিশন সব রকমের পদক্ষেপ নিচ্ছে।

এর আগে, গতকাল সুপ্রিম কোর্টের রায়ের পর চূড়ান্ত ভোটার তালিকা প্রকাশের সময়সীমা আরও পিছোতে পারে বলে শ্রী আগরওয়াল জানিয়ে ছিলেন। তিনি বলেন, সুপ্রিম কোর্টের নির্দেশ মত এস আই আর এর তথ্য যাচাইয়ের কাজ আরো সাত দিন বাড়ানো হলে ২১ ফেব্রুয়ারির আগে চূড়ান্ত ভোটার তালিকা প্রকাশ করা সম্ভব হচ্ছে না। অন্যদিকে, জমা পড়া নথির তথ্য যাচাইয়ের পাশাপাশি শুনানি প্রক্রিয়া চালিয়ে যাওয়া হবে বলে রাজ্যের মুখ্য নির্বাচনী আধিকারিক এর দপ্তর সূত্রে জানা গিয়েছে।

উল্লেখ্য, বিশেষ নিবিড় সংশোধনী প্রক্রিয়ায় এখনও পর্যন্ত ১ কোটি ৩৯ লক্ষ ভোটারের শুনানি সম্পন্ন হয়েছে। নথি আপলোডের সংখ্যা দাঁড়িয়েছে ১ কোটি ৬ লক্ষ। বাকি কাজ দ্রুত শেষ করার চেষ্টা চলছে বলে তিনি জানান।

অন্যদিকে, সুপ্রিম কোর্টে রাজ্য সরকারের জমা দেওয়ার তালিকা অনুযায়ী ৮ হাজার ৫ শো ৫ জন গ্রুপ-বি আধিকারিককে মাইক্রো অবজারভার হিসেবে নিয়োগ করে চূড়ান্ত ভোটার তালিকা যাচাইয়ের কাজে নিযুক্ত করা হবে। সমগ্র প্রক্রিয়া শেষ করে ২৮ ফেব্রুয়ারির মধ্যে চূড়ান্ত তালিকা প্রকাশ করা কমিশনের লক্ষ্য বলে জানা গেছে।

এসআইআর-কে মুখ্যমন্ত্রী মমতা ব্যানার্জী যে ভিক্টিম কার্ড হিসাবে ব্যবহার করার চেষ্টা করেছিলেন, সুপ্রিম কোর্টের রায়ে তা নষ্ট হয়ে গেছে বলে বিজেপি সাংসদ দলের মুখপাত্র ডক্টর সস্বিত পাত্র মন্তব্য করেছেন।

বাইট সস্বিত

অন্যদিকে, রাজ্য বিজেপির মুখপাত্র দেবজিত সরকার বলেছেন, দল, নো এসআইআর নো ভোটার পক্ষে। ডিজিপিকে শোকজ করার সিদ্ধান্তকেও স্বাগত জানান তিনি।

বাইট দেবজিত

পিলারে ফাটল দেখা দেওয়ায় গত বছরের জুলাই মাস থেকে বন্ধ থাকা মেট্রো রেলের ব্লু লাইন করিডরের কবি সুভাষ স্টেশন চলতি বছরের পুজোর সময় খুলে দেওয়ার লক্ষ্যমাত্রা নেওয়া হয়েছে বলে মেট্রো রেল সূত্রে জানা গিয়েছে। রেলমন্ত্রী অশ্বিনী বৈষ্ণব রাজ্যসভায় জানিয়েছেন, স্টেশনের পরিকাঠামো সংস্কারের কাজ দ্রুত গতিতে

চলছে। যাত্রীদের অসুবিধার কথা মেনে নিয়ে তিনি কলকাতা মেট্রো কর্তৃপক্ষকে আরও সক্রিয় হওয়ার নির্দেশ দেন।

উল্লেখ্য স্টেশন সংস্কারের জন্য মেট্রো রেল ইতিমধ্যেই নয় কোটি টাকা বরাদ্দ করেছে। প্রথমে অবশ্য দশ মাসের মধ্যে স্টেশনের কাজ সম্পূর্ণ হবে বলে মেট্রো কর্তৃপক্ষ জানিয়েছিল।

আজকের প্রসঙ্গ অনুষ্ঠানে এবারের বিষয় প্রগতি। আজ শুনবেন বিশেষ আলোচনা “সুস্থ ভারত গড়ে তুলতে হর ঘর জল কর্মসূচি”। ইন্ডিয়ান ইনস্টিটিউট অফ ম্যানেজমেন্ট কলকাতার অবসরপ্রাপ্ত অধ্যাপক প্রফেসর সুজয়া বসুর সঙ্গে কথা বলেছেন কাশফিন নাহার। আকাশবাণীর সংবাদ বিভাগ প্রযোজিত অনুষ্ঠানটি শুনবেন রাত আটটায় গীতাঞ্জলি, DTH বাংলা এবং আকাশবাণী সংবাদ কলকাতা সোশ্যাল মিডিয়া প্লাটফর্মে।

উচ্চ মাধ্যমিকের চতুর্থ তথা চূড়ান্ত সেমিস্টার শুরু হতে চলেছে আগামী বৃহস্পতিবার ১২ই ফেব্রুয়ারি। চতুর্থ সেমিস্টার ছাড়াও তৃতীয় সেমিস্টারের সাপ্লিমেন্টারি এবং পুরনো পদ্ধতিতে উচ্চমাধ্যমিক শুরু হবে ওই দিন থেকেই। মোট পরীক্ষার্থীর সংখ্যা সাত লক্ষের বেশি। ছাত্রদের তুলনায় ছাত্রীদের সংখ্যা এবার বেশি। চতুর্থ সেমিস্টারের পরীক্ষা শুরু হবে সকাল ১০ টায়। চলবে বেলা বারোটা পর্যন্ত। বৃত্তিমূলক বিষয়ের পরীক্ষা চলবে সকাল ১০ টা থেকে ১১টা ১৫ পর্যন্ত। তৃতীয় সেমিস্টারের সাপ্লিমেন্টারি পরীক্ষা চলবে দুপুরে একটা থেকে দুটো ১৫ পর্যন্ত এবং পুরনো পদ্ধতির উচ্চ মাধ্যমিক চলবে সকাল দশটা থেকে একটা পনেরো পর্যন্ত।

বিদ্যাসাগর ভবনে গতকাল এক সাংবাদিক বৈঠকে উচ্চমাধ্যমিক শিক্ষা সংসদের সভাপতি চিরঞ্জীব ভট্টাচার্য জানান, এবার ১০৪ টি পরীক্ষা কেন্দ্রকে স্পর্শকাতর হিসেবে চিহ্নিত করা হয়েছে।

(বাইট - চিরঞ্জীব ভট্টাচার্য)

তিনি বলেন, পরীক্ষার্থীদের সকাল ন'টার মধ্যে পরীক্ষা কেন্দ্রে ঢুকতে হবে। পরীক্ষা কেন্দ্রে ঢোকার সময় মেটাল ডিটেক্টর দিয়ে তল্লাশি চালানো হবে। মোবাইল ফোন, স্মার্ট ওয়াচ সহ কোনরকম বৈদ্যুতিন সামগ্রিক নিয়ে পরীক্ষার্থীদের ঢুকতে দেওয়া হবে না। পরীক্ষা চলাকালীন এই ধরনের জিনিস নিয়ে কোনো পরীক্ষার্থী ধরা পড়লে তার সব পরীক্ষা বাতিল করা হবে বলে প স্পষ্ট জানান তিনি।

অন্যদিকে, এসআইআর প্রক্রিয়ার জন্য অনেক শিক্ষক ব্যস্ত থাকায় এবার চতুর্থ সেমিস্টারের পরীক্ষায় পরিদর্শক হিসাবে প্রাথমিক ও উচ্চ প্রাথমিক শিক্ষকদের দায়িত্ব দেওয়া হতে পারে। এক একটি পরীক্ষা কেন্দ্রে তিন ধরনের পরীক্ষার্থী উচ্চ মাধ্যমিক দেবেন। সব মিলিয়ে প্রায় ৩৫ হাজার শিক্ষক দরকার। প্রাথমিক শিক্ষকের পরিদর্শক হিসাবে নিয়োগের জন্য শিক্ষা দপ্তরে আবেদন জানানো হবে বলে শ্রী ভট্টাচার্য জানান।

আসন্ন উচ্চমাধ্যমিক পরীক্ষার দিনগুলিতে পরীক্ষার্থীদের সুবিধায় যানজট এড়াতে কলকাতা পুলিশ তাদের নির্ধারিত এলাকায় যান চলাচল নিয়ন্ত্রন করবে। এক বিজ্ঞপ্তিতে জানানো হয়েছে, আগামী বৃহস্পতিবার ১২ তারিখ থেকে ২৭ তারিখ পর্যন্ত পরীক্ষার দিনগুলিতে জরুরী পন্য ছাড়া সকাল ৬ টা থেকে দুপুর ১২টা পর্যন্ত পন্যবাহী যান

চলাচল নিয়ন্ত্রন করা হবে। তবে বন্দরমুখী পন্যবাহী যান চলাচলের অনুমতি দেওয়া হবে সকাল ৮ টা পর্যন্ত।

মাদক আইনের অধীনে পুলিশ মূর্শিদাবাদের লালগোলায় তৃণমূল কংগ্রেসের বহিষ্কৃত বিধায়ক, জনতা উন্নয়ন পার্টির চেয়ারম্যান হুমায়ুন কবিরের জামাই ও আত্মীয়ের বিপুল টাকার সম্পত্তি বাজেয়াপ্ত করেছে। একটি বাড়ি, হোটেল ও বে-সরকারী স্কুল সহ এই সম্পত্তির আর্থিক মূল্য ১০ কোটি টাকারও বেশি। জানা গেছে, হুমায়ুন কবীরের মেয়ের শশুর সরিফুল ইসলামের নামে লালাগোলা থানায় মাদক আইনে একাধিক মামলা দায়ের হয়। মাদক পাচারের টাকায় এই সম্পত্তি গড়ে উঠেছে বলে অভিযোগ। রাজস্ব ও অর্থ সহ অন্যান্য দফতরের নির্দেশে এই সম্পত্তি বাজেয়াপ্ত করা হয়েছে।

নদীয়ার কোতোয়ালি থানার সেনপুর গ্রামে মৃতের চক্ষুদানকে ঘিরে চাঞ্চল্যকর অভিযোগে একই পরিবারের ৬ জনকে গ্রেপ্তার করা হয়েছে। জানা গেছে, গত রবিবার রাবেয়া বিবি নামে এক বৃদ্ধার মৃত্যুর পর পরিবারের তরফে দাবি করা হয়, তিনি চক্ষুদান করে গেছেন। কিন্তু স্বৈচ্ছাসেবী সংস্থার পক্ষ থেকে কর্নিয়া সংগ্রহ করতে আসলে গ্রামবাসীদের একাংশ চোখ বিক্রি করা হয়েছে বলে অভিযোগ করে। ক্ষুব্ধ গ্রামবাসীরা বৃদ্ধার ছেলে আমির চাঁদ শেখের বাড়িতে চড়াও হয়ে মারধর করেন বলে অভিযোগ। গ্রামবাসীদের লিখিত অভিযোগের ভিত্তিতে পুলিশ আমির সহ ৬ জনকে গ্রেপ্তার করেছে।

শীতকাল বিদায়ের কোন নির্দিষ্ট নির্ঘণ্ট না থাকলেও মাঘ মাসের শেষেই রাজ্য জুড়ে ধীরে ধীরে বাড়তে চলেছে তাপমাত্রা। আগামীকাল পর্যন্ত সর্বনিম্ন তাপমাত্রা স্বাভাবিকের থেকে কিছুটা কম থাকবে তবে তারপরই দুই থেকে তিন ডিগ্রি পর্যন্ত তাপমাত্রা বাড়বে বলে আলিপুর আবহাওয়া দপ্তর জানিয়েছে। এর পরবর্তী সময়ে তাপমাত্রার আর কোন বিশেষ পরিবর্তন হওয়ার সম্ভাবনা নেই। আজ আলিপুরে সর্বনিম্ন তাপমাত্রা রেকর্ড করা হয় ১৫ দশমিক ২ ডিগ্রি সেলসিয়াস স্বাভাবিকের চেয়ে যা আড়াই ডিগ্রি কম।

উত্তরবঙ্গের জেলাগুলিতে বিক্ষিপ্তভাবে আগামী দু'দিন সকালের দিকে হালকা থেকে মাঝারি কুয়াশা থাকার সম্ভাবনা রয়েছে।
